

RM4 juta kena mantu pesakit tungkul sengayuh ba Sarawak: Dr Sim

KOTA SAMARAHAN: Perintah Sarawak udah ngungkupka belanja sepenyampau RM4 juta taun tu nengah Program Bantu Pesakit Tungkul Sengayuh dikena mantu ngelempungka tating belanja pesakit tungkul sengayuh renggat kepenuh, kelebih agi pesakit ti kurang enggau tangan penantai pemisi.

Sapit Premier Sarawak, Datuk Amar Dr Sim Kui Hian madah tuju inisiatif nya dipejalaika dikena nentuka pesakit nerima perubat nitihka timpuh, nyengkaum bantu dikena nampung unguks berubat dialisis.

“Perintah Sarawak tetap komited ngemansangka ekosistem nyaga pengerai ti chukup, muntang diakses sereta bekualiti dikena ngurangka tating belanja pesakit tungkul sengayuh ti balat di nengeri tu,” ku iya mega Menteri Pengerai Mensia Mayuh, Pengawa Berumah enggau Perintah Lokal.

Dr Sim madahka pekarnya dalam teks jaku iya ti dibacha Sapit Menteri Pengerai Mensia Mayuh, Pengawa Berumah enggau Perintah Lokal, Datuk Michael Tiang Ming Tee ke ngarika iya bejadi Pengerami Hari Tungkul Sengayuh Dunya 2026 Renggat Sarawak enggau Pelanda Pengasih Tungkul Sengayuh ti diatur ba Dataran Hal Ehwal Pelajar dan Alumni Universiti Malaysia Sarawak ditu, kena Hari Enam.

Bepelasarka ripot Unit Komunikasi Awam Sarawak (UKAS), nitih ke Dr Sim, Sarawak diatu ngerikodka antara 700 ngagai 800 kes baru



SUKUNG: Tiang (duduk tengah) begambar bebala mayuh enggau raban bansa ke bisi datai ngagai Pengerami Hari Tungkul Sengayuh Dunya 2026 Renggat Sarawak ditu, kena Hari Enam.

penyakit tungkul sengayuh ninting taun enggau lebih 4,800 iku pesakit berubat dialisis di serata nengeri tu.

Ku iya, penyakit tungkul sengayuh ti balat diatu nyadi antara pemar besai pengerai mensia mayuh menua lebu penyampau prevalens nambah ari 9.07 peratus ba taun 2011 ngagai 15.48 peratus ba taun 2018.

“Reti nya, nyau deka siku ari enam iku orang besai tuai di Malaysia nyangka bisi napi penyakit tungkul sengayuh sereta enda nemu diri bisi penyakit nya,” ku iya.

Berebak enggau tu, iya madahka Perintah Sarawak terus ngengapka sukung ngagai sesital perintah besai ngena

chara nyediaka perengka guna enggau kereban berubat.

Entara perengka guna enggau kereban berubat ke udah disediaka nyengkaum lebih 30 buah mesin hemodialisis ti beungkus RM1.2 juta ti dipejalaika ngena inisiatif Bantu Khas Pesakit Tungkul Sengayuh, ku iya.

“Kelimpah ari bantu berubat, perintah nengeri mega bisi nyediaka bantu tambang RM50 ungup tiap kali sesi berubat diberi ngagai pesakit ari menua pesisir, ke jauh ngelawa palan dialisis.

“Mesin hemodialisis tambang mega diperambu deka diagihka taun tu nyengkaum ngagai sesital di Miri, Bintulu, Mukah enggau Sarikei,”

ku iya.

Bekaul enggau Pengerami Hari Tungkul Sengayuh Dunya 2026 Renggat Sarawak ke diatur Yayasan Buah Pinggang Kebangsaan (NKF) enggau kerejasama Pusat Kesihatan Universiti (PKU) UNIMAS ti dipasuk 250 iku penyereta nengah pengawa pelanda pengasih penyauh lima kilometer.

Program nya diatur beserimbai enggau rambai jaku global taun tu, “Kidney Health for All: Caring for People, Protecting the Planet” dikena nambahka penyedar raban bansa bekaul enggau pemesai guna nemu temu enggau nagang penyakit tungkul sengayuh.